



Pranuar / Dorezuar Priljeni/Prodato Received/Delivery	09.03	2022	2	viti god year
Organ /Njesia Org./Unit	Nr Prot Br Prot Prot No	Shtojca Prilog Appendix	Sasia Kolicina Quantity	
SKAMBICK	1270/2022		1/4	



Republika e Kosovës Republika Kosova - Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.58/2022

Këshilli i Pavarur Mbikëqyrës për Shërbimin Civil të Kosovës-Kolegji për shqyrtimin dhe vendosjen e ankesave në përbërje nga: Malsore Gashi-Bajraktari kryetare, Jeton Koca dhe Eshref Shabani-anëtarë dhe Zyle Millaku Gojnovci-Zyrtare e Lartë për Bashkëpunim Profesional në cilësinë e procesmbajtësit, kanë shqyrtuar ankesën e datës 25.01.2022 me numër A.nr.58/2022, të parashtruar nga ankuesi

kundër organit të punësimi/Ministira e Mjedisit, Planifikimit Hapësnor dhe Infrastrukturës, në çështjen juridike "kompensim material", duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datën 08.03.2022, mori këtë:

V E N D I M

Refuzohet si e pa bazuar ankesa me numër A.nr.58/2022 e datës 25.01.2022 e parashtruar nga ankuesi

A r s y e t i m

Ankuesi i punësuar Ministrinë e Infrastrukturës (Ministria e Mjedisit Planifikimit Hapësinor dhe Infrastrukturës) sipas Akt Emërimit të datës 03.07.2014 në pozitën "Zyrtar i Projekteve për Rrugë", me datë 25.06.2021 ka parashtruar kërkesë tek Udhëheqësi i Divizionit të Personelit që të bëhet kompensimi i shtesë mujore mbi pagën bazë sipas Vendimit me Nr.07/29 të datës 31.07.2008 dhe Vendimit Nr.02/39 të datës 08.10.2009 të Qeverisë së Republikës së Kosovës. Udhëheqësi i Divizionit të Personelit më datë 01.07.2021 i është drejtuar me kërkesë Zëvendësueses së Sekretarit të Përgjithshëm të Ministrisë së Punëve të Brendshme për kompensimin e shtesës mbi pagën bazë për ankuesin sipas

vendimeve të Qeverisë së Republikës së Kosovës, mirëpo sipas përgjigjes në ankesë të datës 22.02.2022 nuk ka marr përgjigje në kërkesën e datës 01.07.2021.

Ankuesi, më datë 25.01.2022, ka parashtruar ankesë me Nr. Protokolli: 323/2022 në Këshillin e Pavarur Mbikëqyrës për Shërbimin Civil të Kosovës, të plotësuar më datë 09.02.2022, me nr. protokolli 618/2022, me pretendimet ankimore që të kompensohet me shtesë mbi pagën bazë sipas Vendimit me Nr.07/29 të datës 31.07.2008 dhe Vendimit Nr.02/39 të datës 08.10.2009 të Qeverisë së Republikës së Kosovës, në mënyrë retroaktive nga data 14.08.2019 sipas Vendimit me Nr. 8778 të Sekretarit të Përgjithshëm të Ministrisë së Infrastrukturës dhe Transportit.

Këshilli i Pavarur Mbikëqyrës për Shërbimin Civil të Kosovës, me datë 31.01.2022 ka dërguar kërkesën për përgjigje në ankesë të ankueses në Ministrinë e Mjedisit, Planifikimit Hapësinor dhe Infrastrukturës. Më datë 09.02.2022 Këshilli ka pranuar përgjigje në ankesë nga Ministria e Mjedisit, Planifikimit Hapësinor dhe Infrastrukturës, prej 1/22 faqe.

Kolegji për shqyrtimin dhe vendosjen e ankesave, me qëllim të vërtetimit të plotë dhe të drejtë të gjendjes faktike dhe bazës juridike, për marrjen e vendimit meritore ka administruar këto prova: Ankesën me Nr. Prot:323/2022 të datës 25.01.2022 e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës, të plotësuar më datë 09.02.2022, me nr. protokolli 618/2022; Vendimi nr. protokolli 1509 i datës 10.05.2018; Lista e pagave nga data 01.09.2019 deri me datës 30.09.2019; Lista e inxhinierëve që gëzojnë shtesat në MKRS; Vendimi nr. protokolli 1817 i datës 30.04.2014; Vendimi nr. protokolli 1816 i datës 30.04.2014; Diplomën e datës 26.12.2012 Universitetit të Prishtinës programi Master ,i ankuesit; Diplomën-Bachelor i Hidroteknikës të përfunduar me datë 27.01.2005, Universitetit të Prishtinës; Kontratë e punës e datës 28.04.2010; Kontratë e punës e datës 23.03.2011; Rekomandimin për përtëritjen e kontratës e datës 21.03.2011; Akt Emërimit e datës 03.07.2014; Vendimin i marrëdhënies së punës lëshuar nga Ministria e Infrastrukturës; Vendimin me Nr.07/29 të datës 31.07.2008 dhe Vendimin Nr.02/39 të datës 08.10.2009 të Qeverisë së Republikës së Kosovës; Vendim nr. protokolli 8778 i datës 14.08.2019; Kërkesën nr. protokolli 5557 i datës 25.06.2021 për procedimin tek komisioni për shqyrtimin e shtesave në fushën e teknologjisë informative e ankuesit; Kërkesën për realizimin e shtesave për inxhinierët e datës 01.07.2021 për Zv. Sekretarin e Përgjithshëm të MPB-së; Kërkesë Nr. protokolli 105224 i datës 20.12.2021 për përmbarim të vendimit për kompensim financiar - shtesë mujore në pagë; Përgjigjen në ankesë e datës 09.02.2022; Përshkrimi i detyrave të punës për pozitën "Zyrtar i Projekteve për Rrugë"; Aneksi 1-Lista dhe titujt e punonjësve që do të jenë përfitues të masave stimuluese duke përfshirë edhe shumën për këto pozita; Vendimin Nr.08/45 i datës 09.09.2015 i Qeverisë së Republikës së Kosovës.

Kolegji për shqyrtimin dhe vendosjen e ankesave, pasi ka shqyrtuar të gjitha shkresat e bashkangjitura të lëndës, ka konstatuar se ankesa e ankuesit, **është e pabazuar, sepse:**

Kolegji për shqyrtimin dhe vendosje e ankesave, gjatë shqyrtimit të ligjshmërisë së pretendimeve ankimore të ankuesit, ka analizuar Vendimin Nr.02/39 të datës 08.10.2008 të

Qeverise se Republikës se Kosovës, përmes të cilit është aprovuar lista e pozitive dhe shtesave në pagë për kategori të veçanta të profesioneve deficitare në fushën e teknologjisë informativë dhe inxhinieringut, dhe Vendimin Nr.07/29 të datës 31.07.2008 të Qeverise së Republikës së Kosovës, me të cilin është përcaktuar procedura për parashtrimin dhe trajtimin e kërkesave dhe mënyra e realizimit të shtesave për kategoritë e veçanta të profesioneve deficitare, dhe mbi këtë bazë është konstatuar se aprovimi i shtesave në pagë për pozita deficitare është bërë me qëllim të ruajtjes së kategorive të veçanta deficitare të punonjësve, stimulimit të konkurrimit për profesione të veçanta deficitare dhe zbatimit të parimit të pagesës së njëjtë për punë të njëjtë në të gjitha organizatat buxhetore. Po ashtu, me këtë vendim është përcaktuar se paga bazë së bashku me shtesat mbi pagë nuk mund të tejkalojnë pagën e zyrtarëve të lartë të emëruar nga KELP-i, si dhe është obliguar Ministria përgjegjëse për Administratë Publike dhe Ministria e Financave për shqyrtimin e listës dhe standardëve kualifikuese dhe shumës stimuluese për postet e caktuara, së paku një herë në gjashtë muaj.

Kuvendi i Republikës se Kosovës, me datë 13.05.2010, ka aprovuar Ligjin Nr.03/L-147 për Pagat e Nëpunësve Civil, përmes të cilit është bërë përcaktimi i sistemit dhe strukturës së pagave, shtesave dhe kompensimeve të tjera për nëpunësit civilë, ndërsa me dispozitat e nenit 14 të këtij ligji është përcaktuar se: *1. Shtesat mbi pagën bazë janë: 1.1. shtesa për punë me ndërrime dhe jashtë orarit të punës; 1.2. shtesa për kushte specifike pune; dhe 1.3. shtesa për kushtet e tregut.* Përkritazi me këtë, duke u bazuar në dispozitat e nenit 27 të Ligjit Nr.03/L-147 për Pagat e Nëpunësve Civil, Qeveria e Republikës se Kosovës, me datë 24.12.2012 ka aprovuar Rregulloren Nr.33/2012 për Shtesat në Pagë dhe Kompensime të Tjera të Nëpunësve Civil, përmes të cilës ka përcaktuar kushtet dhe procedurat për shtesat dhe kompensime të tjera mbi pagën bazë të nëpunësve civilë. Me hyrjen në fuqi të kësaj rregullore janë shfuqizuar të gjitha aktet nënligjore të cilat kanë rregulluar shtesat dhe kompensimet tjera të nëpunësve civil, dhe rrjedhimisht edhe Vendimi Nr.02/29 i datës 31.07.2008 dhe Vendimi Nr.02/39 i datës 08.10.2008 i Qeverise se Republikës se Kosovës, konstatim ky i dhëne edhe në Raportin Vjetor të Vitit 2017 të Këshillit të Pavarur Mbikëqyrës për Shërbimin Civil të Kosovës, kështu që duke u bazuar në këtë konstatim, Kolegji vlerëson se pretendimi ankimor i ankuesit për realizimin e shtesës në pagë sipas Vendimit Nr.02/39 të datës 08.10.2008 të Qeverise se Republikës se Kosovës, është i pa bazuar.

Kolegji për shqyrtimin dhe vendosjen e ankesave, bazuar në dispozitat e Rregullores Nr.33/2012 për Shtesat në Pagë dhe Kompensime të Tjera të Nëpunësve Civil, përkatësisht nenin 8 të kësaj rregullore, ka arritur të konstatojë se Ministria përgjegjëse për administratë publike, në bashkëpunim me ministrinë përgjegjëse për financa, mund të kërkojë nga Qeveria që të miratojë një shtesë për kushtet e tregut për pozitat ose llojet e pozitive për të cilat niveli i pagës për personelin e ngjashëm nga organizatat dhe punëdhënësit e tjerë jashtë Shërbimit Civil, është së paku 40% më i lartë sesa niveli i pagës që ofrohet nga Shërbimi Civil, e kjo shkakton vështirësi të konsiderueshme në rekrutimin dhe mbajtjen e personelit të kualifikuar për ato pozita ose lloje të pozitive në administratë publike, ndërsa institucioni për realizimin e shtesës për kushtet të veçanta të tregut duhet t'i ofroje Ministrisë përgjegjëse për administratë publike kërkesën lidhur me arsyeshmërinë e realizimit të shtesës dhe një analizë

që dëshmon vështirësitë të cilat janë hasur nga institucioni gjatë rekrutimit dhe mbajtjes së personit të kualifikuar, listën e pozitave përkatëse dhe koston vjetore të vlerësimit financiar. Shtesa mbi pagën bazë për kushte të veçanta të tregut nuk mund të tejkalojë më shumë se 50% të pagës bazë.

Andaj, pas analizimit dhe vlerësimit të të gjitha shkresave të lëndës si dhe duke u bazuar në nenin 18 paragrafi 1 nën paragrafi 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi si në dispozitiv të këtij Vendimi.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.58/2022

Zyle Millaku Gojnovci

Zyrtare e Lartë për Bashkëpunim Profesional

Malson Gashi **BAJRAKTARI**

Kryetare e Kolegjit



Vendimi i dorëzohet:

- Ankuesit
- Sekretarit të Përgjithshëm të Ministrisë së Mjedisit, Planifikimit Hapësinor dhe Infrastrukturës;
- Udhëheqësit të Njesisë së Burimeve Njerëzore të Ministrisë së Mjedisit, Planifikimit Hapësinor dhe Infrastrukturës; dhe
- Arkivit të KPMSHCK-së.

